

## وقت الحساب

إلي سامعاه مش مفاجأة  
أصلي بَطَلت السكوت  
هُوَّا إيه الي هيبقى ..  
بعد ما الإحساس يموت؟

و النهاردة .. ده قراري  
تتقطع كل الخيوط  
النهاردة.. دا اختياري  
تتقفل كل الخطوط

مش صحيح انّ القرار دا  
وصلتلهُ كده مرة واحدة  
البداية زمنها عدّي  
و النهاية جت النهاردة

---

كل يوم كُت ليكي غلطة  
حاجة بتضايق جديدة  
لَمَّا جَت آخر محطة  
كُت نهاية مش سعيدة

عُمري ما شفت اهتمامك  
أو في يوم كان ليكي دُور  
كُل كلمة مِن كلامك  
كُت برود مِن غير سُعور

لَمَّا كُنت ف مرّة بجزن  
عُمري ما لقيت لهفتك  
لَمَّا كُنت ف مرّة بفرح  
عُمري ما لقيت فرحتك

---

كل يوم كانت هَوَايَتِكَ  
إختلاف و خصام جديد  
زَيِّ ما تقولي سعادَتِكَ ..  
إِنِّي أبقى مش سعيد

كل يوم في مسافة بيننا  
كل يوم عن قبله بُعد  
ألف حاجة واقفة بيننا  
و اسْمِنا عايشين لبعض

لَمَّا نَبْعِد مش هَنَتَعَب  
و الحكاية هتبقى سهلة  
حتى أحسن لَمَّا نَهْرَب  
مِن حياة صعبة و مُمَلَّة

---

مش هكمل باقي عمري  
يوم خصام مع يوم عتاب  
إنتي خدتي كل صبري  
وانتهى وقت الحساب.